

# KEBAKTIAN ADVEN **PERTAMA** KELUARGA BNKP TAHUN 2013

## 1. **Fanunu Lili + Votum**

Tatunu Lili andre ba wamalua fama'anö wamaondragö Fa'atohare Keriso. Tekaoni ita ba wama'anö, me samösa lö sangila ba'wa ba inötö wa'atohare-Nia.

*mutunu lili ...*

Owulo ita ba tatunu Lili andre ba döi Lowalangi Ama, ba döi Yesu Keriso, ba ba döi Geheha Ni'amonio. Yaduhu!

## 2. **Manunö Buku Zinunö No. 350:1-2** **“Ya Tabe Nihaogö Ita”**

1. Ya tabe nihaogö ita, ero ma'ökhö  
Si lö omasi Zo'aya, data'erogö  
Me so Yesu dania, na irugi inötö  
Ifofanö zi so horö, si lö muhaogö
2. Böi tebulö tasekhögö, gera'erada  
Ya tabe'e nibohouni, soroj Geheha  
Me Yehowa zamakhoi, inötö safuria  
Ba wangowuloi samati, tana khöNia

## 3. **Angerönu**

1. Fombaso Mareko 13:33-37
2. Fangandrö
3. Fama'ema huhuo

## **MIFAIGI, BÖI MIFÖRÖ, LÖ'ÖSA MI'ILA GINÖTÖ** ***Mareko 13:33***

ADVEN, eluahania: "fama'anö ba wamaondragö fa'atohare". Tenga ha fama'anö ba wamaondragö fanörö tödö wa'atumbu Yesu me föna (NATAL); no göi fama'anö ba wamaondragö fa'atohare Yesu si mendrua, si lö mu'ila mbawa ba inötö.

Tefodumaduma wa'atohare-Nia, simane "zatua baomo" sofanö, si lö mu'ila hadia ginötö wangawulinia. Tefaduhusi tödö ndra enoni-nia ba wamöfö'ö, ba ba wangai halöwö, fao ba da'ö zohalöwö ba wamokai bawandruhö. Hadia zalua na no arörö ndra enoni andrö, ba no mörö zanaro bawandruhö andrö – na mangawuli zatua baomo? Falukha wönu ba fanguhuku. Andrö te'amenesi: Mifaigi (*berjaga-jaga*) ba böi miförö.

No da'e menemene khöda ba Adven si föföna andre, ena'ö böi arörö ba böi mörö. Hadia geluaha? Böi arörö ita ba ngawalö gisö'isö dödö ba gulidanö, böi arörö dödö ba wangawalö ni'ila hörö; ena'ö'i tafalua fefu nifaluada so danedane ba wamati ba ba wa'omasi khö Yesu Keriso.

Itaria mörö dödöda ba mörö wamatida khö Zo'aya ya'ita, me talulu wa'aurida ba ngawalö gomasiö dödö. Mendrua manö na so wanguma'ö: "talau nilau dödöda fatua abölö, na no atua, ba ma na no tebai, awena tafahatö ita ba gahe röfa." Amuata si manö, hulö ndraono si no mangi'ila ginötö wofanö awö wangawuli nama awö ninania. Gasagasa wa lö satuara ba nomo, ba lalau nilau dödöra: lafalaula gurusi, mo möi yawa ba meza, lata'unöisi nomo, ba tanö bö'önia. Awena lafuli lahaogö nomo na no ahatö wangawuli satuara. Irege hulö zi sökhi amuata ira. Tola falimo, me no la'ila ginötö satuara, ba lö göi i'ila satuara zalua ba nomo.

Bahiza, ba Daroma Li Lowalangi nibasoda, te'ombakha'ö wa lö sangila bawa ba inötö we'aso "zatua baomo". Da'e dumaduma ba we'aso Yesu, Lö sangila inötö, andrö moguna wama'anö ba wamati, fa'omasi ba ba wanötöna. Töra moroi ba da'ö, oi anehe la ngawalö nilau ba gulidanö andre, ba wa'aurida sero ma'ökhö.

Fehede "mifaigi (*berjaga-jaga*) ba böi miförö", no famangelama da'e me oya ngawalö nudu sama'ala<sup>1</sup>. Iwa'ö ba 1 Fetero 5:8 wa Afökha andrö hulö Zingo sindröndöndröndrö, l'alu'alui haniha ni'ania. Oya zamaelungu niha ba ginötö andre, he ngawalö nifotöi "kemajuan zaman", he göi fa'anumana. Andrö moguna tafa'anö ita, ena'ö böi aekhu ba gowöhöna. Tafalalini gera'erada, ta'andrö wangefa khö Zo'aya ya'ita Yesu Keriso; ba ta'okhögö mbuabua Geheha andrö.

So 3 ngawalö zinangea ta'okhögö ba wolawa fa'abölö gafökha andrö:

- (1) Lö mo'aetufa gamakhaitada khö Yesu Keriso;
- (2) Aro ita wahasara dödö ba keluarga, ba si
- (3) alua wahasambua ba Mbanua Niha Keriso.

Ya'itolo ita Lowalangi ba wanörö lala wekolida ba gulidanö andre. Yahudu.

#### 4. **Fangandrö**

*ba mutema'ö faoma sinunö: "Maranata 3 x" (Lala "haleluya 3 x)*

**"Maranatha" 3x**

---

<sup>1</sup> Tola isofusofu sondrönia'ö kebaktian ba nösi nomo hadia manö ngawalö nudu sama'ala ba lala wa'aurira ia da'e. Sökhi na muzaraini molo'ö sifalukha zamösana

**5. Manunö Buku Zinunö No. 350:3**  
**“Ya Tabe Nihagö Ita”**

*te'owuloi wasömbata*

3. Andrö böi ta'olifugö, zi so ba zura  
Hulö we'aso zanagö, we'asoNia  
No tobini ginötö, wangawuli Zo'aya  
Niha si no mama'anö, zi lö te'ala

*tola mufuli mu'anunöisi ndrege awai wangowuloi ame'ela*

**6. Fangandrö (doa syafaat)**  
**Fangandrö Zo'aya**

**7. Howuhowu**

Yafalukha ita fefu wa'ebua dödö Zo'aya ya'ita Yesu Keriso,  
Fa'omasi Lowalangi Ama, ba Fa'awösa Geheha Ni'amoni'ö.  
Yaduhu!

**8. Manunö Buku Zinunö No. 399:1**  
**“Na Irugi Inötö”**

1. Na irugi inötö, irugi inötö wangawuli Yesu  
So la zamuza tö, la zamuza tö möi manguhuku

*Reff:* Omusomuso dödö, niha sanau ölö, na no larugi zawatö  
Fa'alaj zi so horö, na latema zulö nilaura andrö

**9. Ya'ahowu**

*Bersalam-salaman*

**Selamat Adven Pertama 2013**